



Broj: 01-50-1-15-27/08  
Sarajevo, 10. 4. 2008. godine

**Z A P I S N I K**  
27. sjednice Predstavničkog doma  
Parlamentarne skupštine Bosne i Hercegovine,  
održane 10. 4. 2008. godine

Sjednica je počela u 20,50 sati. Prisustvovali su svi poslanici.

Iz Vijeća ministara BiH sjednici su prisustvovali: predsjedavajući Nikola Špirić, ministri Bariša Čolak, Tarik Sadović, Sven Alkalaj i Sredoje Nović, kao i zamjenici ministara Mijo Krešić i Senad Šepić.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, NATO-a, EUPM-a, američke i britanske ambasade, kao i nevladinih organizacija NDI i Centara civilnih inicijativa.

Predsjedavajući Živković podsjetio je da je ova sjednica sazvana po hitnom postupku, pozivom na član 62. stav (3) Poslovnika, po kojem se dnevni red može predložiti i na samoj sjednici, te da su poslanici na klupe dobili prijedlog dnevnog reda.

U raspravi o prijedlogu dnevnog reda učestvovali su Zlatko Lagumdžija i Jozo Križanović.

Zlatko Lagumdžija rekao je da Klub SDP-a nije dobio materijal za 3. tačku dnevnog reda – Prijedlog zakona o izmjenama i dopunama Izbornog zakona BiH. Iskazao je nezadovoljstvo što se sjednica održava u kasnim večernjim satima, s obzirom da bi trebalo da se vodi što temeljitija rasprava. Sugerirao je da se rasprava odgodi do sutra radi ozbiljnosti pitanja koja su na dnevnom redu.

Predsjedavajući Živković rekao je da se materijal za 3. tačku dnevnog reda upravo kopira te da rasprava neće početi dok poslanici ne dobiju materijal. Osim toga, naglasio je da se radi o istom zakonskom prijedlogu koji je odbijen na prošloj sjednici, s vrlo malim razlikama koje su u tekstu Zakona markirane.

Jozo Križanović istakao je da razumije i uvažava značaj prijedloga zakona koji su na dnevnom redu, posebno sa stanovišta preduslova za potpisivanje Sporazuma o stabilizaciji i pridruživanju, ali je naglasio da ipak nije korektno da se radi na ovakav način, s obzirom da je iste zakone Dom odbio na prethodnoj sjednici.

Nakon rasprave, predsjedavajući Doma konstatirao je da 27. sjednica Predstavničkog doma ima sljedeći

**D N E V N I R E D**

1. Zahtjev poslanika Milorada Živkovića, Nike Lozančića i Beriza Belkića za razmatranje Prijedloga zakona o nezavisnim i nadzornim tijelima policijske strukture BiH, po hitnom postupku, u skladu s članom 127. Poslovnika;
2. Zahtjev poslanika Milorada Živkovića, Nike Lozančića i Beriza Belkića za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH, po hitnom postupku, u skladu s članom 127. Poslovnika;
3. Zahtjev poslanika Milorada Živkovića za razmatranje Prijedloga zakona o izmjenama i dopunama Izbornog zakona BiH, po hitnom postupku, u skladu s članom 127. Poslovnika.

**Ad. 1. Zahtjev poslanika Milorada Živkovića, Nike Lozančića i Beriza Belkića za razmatranje Prijedloga zakona o nezavisnim i nadzornim tijelima policijske strukture BiH, po hitnom postupku, u skladu s članom 127. Poslovnika**

Nije bilo rasprave.

Zahtjev za hitni postupak usvojen je sa 21 glasom „za“ (Federacija BiH 12, RS devet), 19 „protiv“ i dva „suzdržana“.

Zatim je predsjedavajući otvorio raspravu o Prijedlogu zakona.

U raspravi i replikama učestvovali su: Zlatko Lagumdžija, Bakir Izetbegović, Martin Raguž, Rifat Dolić, Hadži Jovan Mitrović, Sadik Ahmetović, Lazar Prodanović, Branko Dokić, Drago Kalabić, Denis Bećirović, Vinko Zorić, Šefik Džaferović, Salko Sokolović, Sadik Bahtić, Momčilo Novaković, Husein Nanić, Azra Hadžiahmetović, Beriz Belkić, Jozo Križanović i Remzija Kadrić.

Prijedlog zakona o nezavisnim i nadzornim tijelima policijske strukture BiH usvojen je sa 22 glasa „za“ (Federacija BiH 13, RS devet), 19 „protiv“ i dva „suzdržana“.

**Ad. 2. Zahtjev poslanika Milorada Živkovića, Nike Lozančića i Beriza Belkića za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH, po hitnom postupku, u skladu s članom 127. Poslovnika**

Nije bilo rasprave ni o zahtjevu iz ove tačke dnevnog reda.

Zahtjev za hitni postupak usvojen je sa 22 glasa „za“ (Federacija BiH 13, RS devet), 16 „protiv“ i dva „suzdržana“ glasa.

Nije bilo rasprave o Prijedlogu zakona.

Prilikom glasanja, „za“ su glasala 22 poslanika (Federacija BiH 13, RS devet), „protiv“ je bilo 19 i „suzdržan“ jedan poslanik.

Predsjedavajući je konstatirao da je usvojen Prijedlog zakona o Direkciji za koordinaciju policijskih tijela i o agencijama za podršku policijskoj strukturi BiH.

**Ad. 3. Zahtjev poslanika Milorada Živkovića za razmatranje Prijedloga zakona o izmjenama i dopunama Izbornog zakona BiH, po hitnom postupku, u skladu s članom 127. Poslovnika**

Nije vođena rasprava o zahtjevu za hitni postupak.

Sa 29 glasova „za“ (Federacija BiH 20, RS devet), devet „protiv“ i jednim „suzdržanim“ glasom, usvojen je zahtjev za hitni postupak.

Nakon toga, predsjedavajući Živković je, kao predlagač, ukratko obrazložio Prijedlog zakona.

U raspravi o Prijedlogu zakona učestvovali su: Momčilo Novaković, Šefik Džaferović i Zlatko Lagumdžija.

Sa 32 glasa „za“ (Federacija BiH 23, RS devet), šest „protiv“ i četiri „suzdržana“ glasa, usvojen je Prijedlog zakona o izmjenama i dopunama Izbornog zakona BiH.

Zlatko Lagumdžija predložio je zaključke u četiri tačke, koji se odnose na obaveze koje proističu iz Odluke Vijeća ministara Evropske unije, broj 2008/211/EC., od 18. 2. 2008.

Predsjedavajući Živković dao je na glasanje prijedloge zaključaka koji tom prilikom nisu usvojeni. Rezultati glasanja o zaključcima su sljedeći:

- prvi zaključak: "za" glasalo 13, "protiv" 17;
- drugi zaključak: "za" glasalo 19 (Federacija BiH 16, RS tri), "protiv" 16, "suzdržana" dva. Nakon usaglašavanja u Kolegiju kao komisiji, zbog nedostatka entitetske većine, u drugom krugu glasanja prijedlog zaključka nije dobio većinu ("za" glasalo 18, "protiv" 20, "suzdržana" dva);
- treći zaključak: "za" glasalo 17, "protiv" 18, "suzdržana" dva i
- četvrti zaključak: "za" glasalo 19, "protiv" 19, "suzdržana" dva.

Poslije izjašnjavanja o prijedlozima zaključaka koje je predložio Zlatko Lagumdžija, Dom je, sa 40 glasova "za" (Federacija BiH 27, RS 13), usvojio zaključak koji je predložio Šefik Džaferović, a koji glasi:

**Zadužuje se Centralna izborna komisija BiH da, bez odgađanja, pripremi prečišćeni tekst Izbornog zakona BiH i da ga uputi u parlamentarnu proceduru na usvajanje.**

Ovim je realiziran dnevni red.

Sjednica je završena u 23,55 sati.

Sastavni dio Zapisnika je transkript 27. sjednice.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**dr. Milorad Živković**